

საპრეზიდო პირობების კვლევა

II კვარტალი, 2023



საქართველოს ეროვნული ბანკი
National Bank of Georgia

საკრედიტო პირობების კვლევის მიზანი და მეთოდოლოგია

საქართველოს ეროვნული ბანკი 2013 წლიდან ატარებს საკრედიტო პირობების კვლევას. გამოკითხვა ონლაინ პლატფორმის საშუალებით ტარდება, ხოლო რესპონდენტებს საბანკო სექტორის მაღალი რგოლის მენეჯერები წარმოადგენენ. კვლევის მიზანს რესპონდენტებისაგან დაკრედიტების მიმდინარე და სამომავლო ტენდენციებზე ინფორმაციის მიღება წარმოადგენს. კერძოდ, კვლევა მოიცავს კითხვებს ფიზიკური და იურიდიული პირების სესხებზე მოთხოვნისა და დაკრედიტების საპროცენტო და არასაპროცენტო პირობების ცვლილებაზე, ასევე კითხვებს ამ ცვლილების გამომწვევი ფაქტორების შესახებ.

კითხვარი შედგება მხოლოდ ხარისხობრივი შეკითხვებისაგან და არ მოითხოვს რესპონდენტთა მხრიდან რაოდენობრივ შეფასებას. ინფორმაციის რაოდენობრივ ერთეულებში გარდაქმნისათვის გამოყენებულია საბალანსო სტატისტიკის მეთოდოლოგია. ინდექსი მერყეობს -100-დან 100-მდე. 100 აღნიშნავს, რომ გამოკითხულთა 100% აღიქვამს ტენდენციის მნიშვნელოვან გაუმჯობესებას. ინდექსი -100 აღნიშნავს, რომ რესპონდენტთა 100% მნიშვნელოვან გაუარესებას აღიქვამს. 0 აღნიშნავს, რომ ტენდენცია არ შეცვლილა გასულ კვარტალთან შედარებით. ინდექსის დათვლისას რესპონდენტთა პასუხებს თანაბარი წონა აქვთ მინიჭებული, განურჩევლად ბანკის ზომისა.

გამოკითხვის შედეგების ანალიზის საფუძველზე ყოველ კვარტალურად ქვეყნდება ანგარიში. გარდა კვლევის საბოლოო შედეგებისა, აღნიშნული ანგარიში მოიცავს ოფიციალურ სტატისტიკურ ინფორმაციას დაკრედიტების ტენდენციების შესახებ.

ამ ანგარიშში წარმოდგენილი მოლოდინები ასახავს მხოლოდ საკრედიტო პირობების კვლევის რესპონდენტთა შეფასებას დაკრედიტების მომავალ ტენდენციაზე და არა ეროვნული ბანკის წარმომადგენელთა მოლოდინებს.

საკრედიტო პირობების კვლევა

მოკლე შეჯამება	4
ბიზნესის დაკრედიტების პირობები და ტენდენციები.....	5
ფიზიკური პირების დაკრედიტების პირობები და ტენდენციები	9
დიაგრამა 1. ბიზნეს სესხების მოთხოვნისა და საკრედიტო პირობების ცვლილება.....	5
დიაგრამა 2. ბიზნეს სესხების საკრედიტო პირობების ცვლილებაზე მოქმედი ფაქტორები.....	6
დიაგრამა 3. საპროცენტო განაკვეთები და ნარჩენი ვადიანობა ბიზნეს სესხებზე	7
დიაგრამა 4. ბიზნეს სესხებში უმოქმედო და უარყოფილი სასესხო განაცხადების წილი	8
დიაგრამა 5. ფიზიკური პირების სესხებზე მოთხოვნისა და საკრედიტო პირობების ცვლილება	9
დიაგრამა 6. ფიზიკურ პირებზე გაცემული სესხების დაკრედიტების პირობების ცვლილებაზე მოქმედი ფაქტორები	10
დიაგრამა 7. სესხის მომსახურეობისა (PTI) და უზრუნველყოფის (LTV) კოეფიციენტების განაწილება.....	10
დიაგრამა 8. ფიზიკურ პირებზე გაცემულის სესხების საპროცენტო განაკვეთები და ნარჩენი ვადიანობა	11
დიაგრამა 9. უმოქმედო და უარყოფილი სასესხო განაცხადების წილი ფიზიკურ პირებზე გაცემულ სესხებში	12

მოკლე შეჯამება


საკრედიტო პირობების კვლევის მიხედვით, 2023 წლის მეორე კვარტალში, წინა კვარტალთან შედარებით, ბიზნეს სესხებზე მოთხოვნა მცირედით გაიზარდა. საბანკო სექტორის წარმომადგენლები მომდევნო კვარტალში ბიზნეს სესხებზე მოთხოვნის მცირე ზრდას კვლავ ელიან. ამავე კვლევის მიხედვით, მეორე კვარტალში დაკრედიტების, როგორც საპროცენტო ისე არასაპროცენტო პირობები მცირედით გამკაცრდა უცხოური ვალუტით გაცემული მცირე და საშუალო ბიზნეს სესხებისთვის. დაკრედიტების პირობების გამკაცრება ძირითადად ფინანსური რესურსის ხარჯის ზრდით იყო განპირობებული. საბანკო სექტორის წარმომადგენლები მომდევნო კვარტალში უცხოური ვალუტით გაცემულ სესხებზე დაკრედიტების საპროცენტო პირობების მცირედით გამკაცრებას კვლავ ელიან, ხოლო არასაპროცენტო პირობების მნიშვნელოვანი ცვლილება მოსალოდნელი არაა.

საკრედიტო პირობების კვლევის მიხედვით, 2023 წლის მეორე კვარტალში, წინა კვარტალთან შედარებით, ფიზიკურ პირებზე გაცემულ სესხებზე მოთხოვნა მცირედით გაიზარდა. მომდევნო კვარტალში ფიზიკურ პირებზე გაცემულ სესხებზე მოთხოვნის მცირედით ზრდა კვლავ მოსალოდნელია. კვლევის მიხედვით, დაკრედიტების არასაპროცენტო პირობები ფიზიკურ პირებზე გაცემული სესხებისთვის მნიშვნელოვნად არ შეცვლილა. საპროცენტო პირობები არ შეცვლილა ეროვნული ვალუტით გაცემული სესხებისათვის, ხოლო უცხოური ვალუტის შემთხვევაში მცირედით გამკაცრდა. საბანკო სექტორის წარმომადგენლელთა აზრით, მომდევნო კვარტალში დაკრედიტების პირობების მნიშვნელოვანი ცვლილება მოსალოდნელი არაა.

ბიზნესის დაკრედიტების პირობები და ტენდენციები

საკრედიტო პირობების კვლევის მიხედვით, 2023 წლის მეორე კვარტალში, წინა კვარტალთან შედარებით, ბიზნეს სესხებზე მოთხოვნა გაიზარდა. საბანკო სექტორის წარმომადგენლები 2023 წლის მესამე კვარტალში ბიზნეს სესხებზე მოთხოვნის მცირე ზრდას კვლავ ელიან. ეროვნული ბანკის ხელთ არსებულ მონაცემებზე დაყრდნობით, 2023 წლის მეორე კვარტალში, წინა კვარტალთან შედარებით, ბიზნეს სესხების პორტფელის ზრდამ 18%¹ შეადგინა. ვალუტების ჭრილში ბიზნეს სესხების ზრდა მნიშვნელოვანწილად კვლავ უცხოური ვალუტით გაცემულმა სესხებმა განაპირობა. მნიშვნელოვანია აღინიშნოს, რომ ბიზნეს სესხების ზრდა სექტორულ ჭრილში ძირითადად მშენებლობის, ვაჭრობისა და მომსახურეობის სექტორების დაკრედიტებამ განაპირობა. საკრედიტო პირობების კვლევის მიხედვით, 2023 წლის მესამე კვარტალში ბიზნეს სესხებზე მოთხოვნის მცირე ზრდას კვლავ ელიან (იხ. დიაგრამა 1).

დიაგრამა 1. ბიზნეს სესხების მოთხოვნისა და საკრედიტო პირობების ცვლილება²



წყარო: საკრედიტო პირობების კვლევა, სებ.

2023 წლის მეორე კვარტალში, წინა კვარტალთან შედარებით, დაკრედიტების პირობები ბიზნეს სესხებისთვის მცირედით გამკაცრდა უცხოურ ვალუტაში, რაც ძირითადად ფინანსური რესურსის ხარჯის ზრდამ განაპირობა. დაკრედიტების პირობების მცირედი გამკაცრება ძირითადად ფინანსური რესურსის ხარჯის ზრდით იყო განპირობებული. თუმცა, უნდა აღინიშნოს, რომ დაკრედიტების პირობების შერბილებაზე დადებითად მოქმედებდა მონეტარული პოლიტიკის ცვლილება (იხ. დიაგრამა 2). ეროვნული ბანკის ხელთ არსებულ მონაცემებზე დაყრდნობით,


¹ აღნიშნული მონაცემი ასახავს გაცვლითი კურსის ეფექტის გამორიცხვით, სეზონურად შესწორებული სესხების გაწლიურებულ ზრდას.

² საკრედიტო პირობებისა და მოთხოვნის ცვლილების ინდექსი მერყეობს -100-დან 100-მდე. 100 აღნიშნავს, რომ რესპონდენტების 100% აღიქვამს ტენდენციის მნიშვნელოვან გამკაცრებას/ზრდას; -100 აღნიშნავს მნიშვნელოვან შერბილებას/შემცირებას; 0 აღნიშნავს, რომ ტენდენცია არ შეცვლილა გასულ კვარტალთან შედარებით. 2023Q3* ასახავს საბანკო სექტორის წარმომადგენლების მოლოდინებს 2023 წლის მესამე კვარტალზე.

არასაპროცენტო პირობები, როგორიცაა საკრედიტო ხაზის ლიმიტი, არ შეცვლილა, თუმცა სესხის ვადიანობა მცირედით შემცირდა (იხ. დიაგრამა 3). საბანკო სექტორის წარმომადგენლები არასაპროცენტო პირობების მნიშვნელოვან ცვლილებას მომდევნო კვარტალში არ ელიან. ეროვნული ბანკის ხელთ არსებულ მონაცემებზე დაყრდნობით, ივნისში, მარტთან შედარებით, საპროცენტო განაკვეთი თვის შიგნით ეროვნული ვალუტით გაცემულ მსხვილ ბიზნეს სესხებზე 0.44 პპ-ით, 14.1%-მდე შემცირდა.

რაც შეეხება უცხოური ვალუტით გაცემულ სესხებს, ივნისში, მარტთან შედარებით, თვის შიგნით გაცემული მსხვილი ბიზნეს სესხებისთვის საპროცენტო განაკვეთი ევროთი გაცემული სესხებისათვის მნიშვნელოვნად არ შეცვლილა და 7.4% შეადგინს, ხოლო დოლარით გაცემული სესხებისათვის 10.3%-მდე გაიზარდა. მცირე და საშუალო ბიზნეს სესხებისთვის, საპროცენტო განაკვეთი ეროვნული ვალუტით გაცემული სესხებისთვის მცირედით შემცირდა 14.4%-მდე. რაც შეეხება უცხოური ვალუტით გაცემული სესხებს, დოლარით გაცემული სესხებისთვის საპროცენტო განაკვეთი 0.4 პპ-ით გაიზარდა და 8.7% შეადგინა, ხოლო ევროთი გაცემული სესხებისთვის საპროცენტო განაკვეთი, 0.4 პპ-ით, 6.7%-მდე შემცირდა (იხ. დიაგრამა 3). საკრედიტო პირობების კვლევის მიხედვით, გაიზარდა განაკვეთი ფიქსირებული განაკვეთით გაცემული უცხოური ვალუტის სესხებზეც. გამოკითხულთა აზრით, მომდევნო კვარტალში საპროცენტო განაკვეთი უცხოური ვალუტით გაცემული სესხებისთვის შესაძლოა მცირედით კვლავ გაიზარდოს.


დიაგრამა 2. ბიზნეს სესხების საკრედიტო პირობების ცვლილებაზე მოქმედი ფაქტორები³



წყარო: საკრედიტო პირობების კვლევა

³ დიაგრამა საკრედიტო პირობების ცვლილებაში თითოეული ფაქტორის წილს ასახავს. დადებითი წილი მიუთითებს ფაქტორის წილს გამვაცრებაში, ხოლო უარყოფითი შერჩილებაში.

დიაგრამა 3. საპროცენტო განაკვეთები და ნარჩენი ვადიანობა ბიზნეს სესხებზე⁴




წყარო: სებ.

2023 წლის მეორე კვარტალში უმოქმედო სესხების წილი ბიზნეს სესხებში მცირდით შემცირდა. მეორე კვარტალში, წინა კვარტალთან შედარებით, უმოქმედო სესხების წილი ჯამურად ბიზნეს სესხებში 0.2 პპ-ით შემცირდა და 3.7% შეადგინა. ვალუტების ჭრილში, მნიშვნელოვანია აღინიშნოს, რომ უმოქმედო სესხების წილი ეროვნული ვალუტით გაცემულ ბიზნეს სესხებში მნიშვნელოვნად არ შეცვლილა და 3% იყო. ხოლო, აშშ დოლარით და ევროთი გაცემულ სესხებში უმოქმედო სესხების წილი მცირდით შემცირდა და 5% და 3% შეადგინა, შესაბამისად (იხ. დიაგრამა 4). საკრედიტო პირობების კვლევის მიხედვით, საბანკო სექტორის წარმომადგენლები მომდევნო კვარტალში უმოქმედო სესხების წილის შემცირებას კვლავ ელიან. გარდა ამისა, მნიშვნელოვანია აღინიშნოს, რომ 2023 წლის მეორე კვარტალში, წინა კვარტალთან შედარებით, რესტრუქტურიზებული სესხების წილი ბიზნეს სესხებში 1.7 პპ-ით, 15.9%-მდე შემცირდა, რაც ბიზნეს სესხების პორტფელის ხარისხის გაუმჯობესებაზე მიუთითებს.

2023 წლის მეორე კვარტალში, წინა კვარტალთან შედარებით, უარყოფილი სასესხო განაცხადების წილი, როგორც ეროვნული, ისე უცხოური ვალუტით გაცემულ მცირე და საშუალო ბიზნეს სესხებში შემცირდა. მეორე კვარტალში, წინა კვარტალთან შედარებით, უარყოფილი სასესხო განაცხადების წილი ეროვნული ვალუტით გაცემულ მცირე და საშუალო ბიზნეს სესხებში მცირდით შემცირდა 11.4%-მდე, ხოლო უცხოური ვალუტით გაცემული სესხებისთვის 2.6 პპ-ით შემცირდა 8%-მდე. რაც შეეხება მსხვილ ბიზნეს სესხებს, პირველ კვარტალში, წინა კვარტალთან შედარებით, უარყოფილი სასესხო განაცხადების წილი ლარში მნიშვნელოვნად არ შეცვლილა, ხოლო უცხოურ ვალუტაში 0.6 პპ-ით გაიზარდა საშუალოდ 1%-მდე (იხ. დიაგრამა 4).

⁴ საპროცენტო განაკვეთი და ნარჩენი ვადიანობა თვეებში თვის შიგნით გაცემულ მცირე და საშუალო და მსხვილი ბიზნეს სესხების ნაკადებზე.

დიაგრამა 4. ბიზნეს სესხებში უმოქმედო და უარყოფილი სასესხო განაცხადების წილი




წყარო: სებ.

ფიზიკური პირების დაკრედიტების პირობები და ტენდენციები

საკრედიტო პირობების კვლევის მიხედვით, 2023 წლის მეორე კვარტალში, წინა კვარტალთან შედარებით, ფიზიკურ პირებზე გაცემულ სესხებზე მოთხოვნა მცირედით გაიზარდა. მომდევნო კვარტალში ფიზიკურ პირებზე გაცემულ სესხებზე მოთხოვნის მცირედით ზრდა კვლავ მოსალოდნელია. ეროვნული ბანკის ხელთ არსებულ მონაცემებზე დაყრდნობით, მეორე კვარტალში, წინა კვარტალთან შედარებით, ფიზიკურ პირებზე გაცემული სესხების გაწლიურებულმა ზრდის ტემპმა⁵ 14.4% შეადგინა (იხ. დიაგრამა 5). ვალუტების ჭრილში ფიზიკურ პირებზე გაცემული სესხების ზრდა მნიშვნელოვანწილად ეროვნული ვალუტით გაცემულმა სესხებმა განაპირობა. მნიშვნელოვანია აღინიშნოს, რომ მეორე კვარტალში უცხოური ვალუტით დაკრედიტების გაწლიურებულმა ზრდის ტემპმა 6.1% შეადგინა. საბანკო სექტორის წარმომადგენლები მომდევნო კვარტალში ფიზიკურ პირებზე გაცემულ სესხებზე მოთხოვნის მცირედით ზრდას კვლავ ელიან.

დიაგრამა 5. ფიზიკური პირების სესხებზე მოთხოვნისა და საკრედიტო პირობების ცვლილება⁶



წყარო: საკრედიტო პირობების კვლევა, სებ.


2023 წლის მეორე კვარტალში ფიზიკურ პირებზე გაცემული სესხებისთვის დაკრედიტების არასაპროცენტო პირობები მნიშვნელოვნად არ შეცვლილა. ეროვნული ბანკის ხელთ არსებულ მონაცემებზე დაყრდნობით, 2023 წლის მეორე კვარტალში, წინა კვარტალთან შედარებით, სესხის ვადიანობა მცირედით შემცირდა, როგორც ეროვნული ისე უცხოური ვალუტით გაცემული იპოთეკური სესხებისთვის. გარდა ამისა, შემცირდა იმ სესხების წილი, რომელთა სესხის

⁵ აღნიშნული მონაცემი ასახავს გაცვლითი კურსის ეფექტის გამორიცხვით, სეზონურად შესწორებული სესხების გაწლიურებულ ზრდას.

⁶ იხ. დიაგრამა 1-ის მეორე შენიშვნა.


მომსახურეობის კოეფიციენტი (PTI) 50%-ზე მეტია. სესხის უზრუნველყოფის (LTV) კოეფიციენტები მნიშვნელოვნად არ შეცვლილა. მთლიანობაში დაკრედიტების პირობების ცვლილება უმნიშვნელო იყო (იხ. დიაგრამა 6-8).

დიაგრამა 6. ფიზიკურ პირებზე გაცემული სესხების დაკრედიტების პირობების ცვლილებაზე მოქმედი ფაქტორები⁷



წყარო: საკრედიტო პირობების კვლევა

დიაგრამა 7. სესხის მომსახურეობისა (PTI) და უზრუნველყოფის (LTV) კოეფიციენტების განაწილება




წყარო: სებ.

საპროცენტო განაკვეთები ფიზიკურ პირებზე ეროვნული ვალუტით გაცემული სესხებისთვის შემცირდა, ხოლო უცხოური ვალუტის სესხებისათვის მცირედით გაიზარდა. კერძოდ, ივნისში, მარტთან შედარებით, ეროვნული ვალუტით გაცემული სამომხმარებლო სესხებისთვის საპროცენტო განაკვეთი 1 პპ-ით შემცირდა და 17.9% შეადგინა. აგრეთვე 1 პპ-ით შემცირდა

⁷ იხ. დიაგრამა 2-ის შენიშვნა.

იპოთეკური სესხებისთვის საპროცენტო განაკვეთი და 11.8% შეადგინა. რაც შეეხება უცხოური ვალუტის სესხებს, საპროცენტო განაკვეთი აშშ დოლარით გაცემული იპოთეკური სესხებისთვის არ შეცვლილა და 7.8% შეადგინს, ხოლო ევროთი გაცემული სესხებისთვის მცირედით გაიზარდა და 6.2% შეადგინს (იხ. დიაგრამა 8). გამოკითხულთა აზრით, მომდევნო კვარტალში ეროვნული და უცხოური ვალუტით გაცემული იპოთეკური და სამომხმარებლო სესხების საპროცენტო განაკვეთების მნიშვნელოვანი ცვლილება მოსალოდნელი არაა.

დიაგრამა 8. ფიზიკურ პირებზე გაცემული სესხების საპროცენტო განაკვეთი და ნარჩენი ვადიანობა⁸



წყარო: სებ.


2023 წლის პირველ კვარტალში, წინა კვარტალთან შედარებით, უმოქმედო სესხების წილი ფიზიკურ პირებზე გაცემულ სესხებში მნიშვნელოვნად არ შეცვლილა. კერძოდ, ეროვნული ბანკის ხელთ არსებულ მონაცემებზე დაყრდნობით, უმოქმედო სესხების წილი იპოთეკურ და სამომხმარებლო სესხებში მნიშვნელოვნად არ შეცვლილა და 3% და 5% შეადგინა, შესაბამისად. ვალუტების ჭრილში, მნიშვნელოვნად არ შეცვლილა უმოქმედო სესხების წილი უცხოური ვალუტით გაცემულ იპოთეკურ სესხებში. კერძოდ, ევროთი და დოლარით გაცემულ იპოთეკურ სესხებში უმოქმედო სესხების წილი უმნიშვნელოდ შემცირდა და 3% შეადგინა. რაც შეეხება ეროვნული ვალუტით გაცემულ იპოთეკურ სესხებს, უმოქმედო სესხების წილი მნიშვნელოვნად არ შეცვლილა და 3% შეადგინა (იხ. დიაგრამა 9). საბანკო სექტორის წარმომადგენლები 2023 წლის მესამე კვარტალში უმოქმედო სესხების წილის მნიშვნელოვან ცვლილებას არ მოელიან. გარდა ამისა, მნიშვნელოვანია აღინიშნოს, რომ 2023 წლის მეორე კვარტალში, წინა კვარტალთან შედარებით, რესტრუქტურიზებული სესხების წილი ფიზიკურ პირებზე გაცემულ სესხებში 0.6 პპ-ით შემცირდა და 12.9% შეადგინა. აღნიშნული მაჩვენებელი 2022 წლის მეორე კვარტალთან

⁸ საპროცენტო განაკვეთი და ნარჩენი ვადიანობა თვეებში ფიზიკურ პირებზე თვის შიგნით გაცემულ სესხების ნაკადებზე.

შედარებით 3.0 პპ-ით არის შემცირებული, რაც ფიზიკურ პირებზე გაცემული სესხების პორტფელის ხარისხის გაუმჯობესებაზე მიუთითებს.

2023 წლის პირველ კვარტალში უარყოფილი სასესხო განაცხადების წილი ეროვნული ვალუტით გაცემულ იპოთეკურ სესხებში შემცირდა. მეორე კვარტალში, წინა კვარტალთან შედარებით, უარყოფილი სასესხო განაცხადების წილი სამომხმარებლო სესხებში მნიშვნელოვნად არ შეცვლილა და 50% იყო. რაც შეეხება იპოთეკურ სესხებს, უარყოფილი სასესხო განაცხადების წილი შემცირდა ეროვნული ვალუტით გაცემულ სესხებში და 21% შეადგინა, ხოლო უცხოური ვალუტით გაცემულ სესხებში მცირედით გაიზარდა და 26% იყო (იხ. დიაგრამა 9).

დიაგრამა 9. უმოქმედო და უარყოფილი სასესხო განაცხადების წილი ფიზიკურ პირებზე გაცემულ სესხებში



წყარო: სებ

პასუხისმგებლობის შეზღუდვის განაცხადი

ანგარიში მომზადდა საქართველოს ეროვნული ბანკის ფინანსური სტაბილურობის დეპარტამენტის ფინანსური სტაბილურობის ანალიზისა და მაკროფინანსური მოდელირების განყოფილების მიერ. ამ ანგარიშში წარმოდგენილი მოლოდინები ასახავს მხოლოდ საკრედიტო პირობების კვლევის რესპონდენტთა შეფასებას დაკრედიტების მომავალ ტენდენციაზე და არა ეროვნული ბანკის წარმომადგენელთა მოლოდინებს. ანგარიშში წარმოდგენილი სტატისტიკა დაკრედიტების მიმდინარე ტენდენციაზე განკუთვნილია მხოლოდ მიმდინარე ანალიტიკური მიზნებისთვის, რადგანაც აქ წარმოდგენილი ზოგიერთი მონაცემი შესაძლოა დაექვემდებაროს პერიოდულ გადახედვას და შესაბამისად, ისინი შეიძლება შეიცავდეს გაზომვის ცდომილებებს. მიუხედავად იმისა, რომ ყველა ზომაა მიღებული მონაცემთა დროულად, კორექტულად და სრულყოფილად წარმოსადგენად, საქართველოს ეროვნული ბანკი არ იძლევა გარანტიას მონაცემთა სრულ სიზუსტეზე. მიმოხილვაში გამოქვეყნებული ზოგიერთი მონაცემი შესაძლოა განსხვავდებოდეს ეროვნული ბანკის ვებ-გვერდზე "სტატისტიკის" რუბრიკაში გამოქვეყნებული მონაცემებისგან, რადგანაც გაანგარიშებებში გამოყენებულია საზედამხედველო მონაცემები.

მონაცემები წარმოდგენილია 30/06/2023-ის მდგომარეობით.

დამატებითი კითხვებით შეგიძლიათ მიმართოთ ბეჭა გურგენიძეს

ელ-ფოსტა: Beka.gurgenidze@nbg.gov.ge ტელ: (+995) 579 170245



საქართველოს ეროვნული ბანკი
National Bank of Georgia

საქართველო, თბილისი 0114, სანაპიროს 2

(995 32) 2 406 406

info@nbg.ge; www.NBG.ge